

金剛頂瑜伽經十八會指歸

唐特進試鴻臚卿三藏沙門大廣智不空奉詔譯

金剛頂經瑜伽有十萬偈十八會初會名一切如來真實攝教王有四大品一名金剛界二名降三世三名徧調伏四名一切義成就表四智印於初品中有六曼荼羅所謂金剛界大曼荼羅并說毗盧遮那佛受用身以五相現成等正覺五相者所謂通達本心修華身圓滿此則五智通達成佛後以金剛三摩地現發生三十七智廣說曼荼羅儀則為弟子受速證

菩薩地法第二說陀羅尼曼荼羅具三十七此中聖眾皆住波羅蜜形廣說入曼荼羅儀軌為弟子受四種眼說敬愛鉤召降伏息災等儀軌第三說微細金剛曼荼羅亦具三十七聖眾於金剛杵中畫各持定印廣說入曼荼羅儀軌為弟子令心堪任令心調柔令心自在說微細金剛三摩地修四靜慮法修四無量心及三解脫門第四說一切如來廣大供養羯磨曼荼羅亦具三十七彼中聖眾各持本標幟供養而住廣說入曼荼羅法弟子

說受十六大供養法第五說四印曼荼羅法
弟子受四種速成就以此曼荼羅求悉地成
就像如上四曼荼羅中所求悉地於此像前
求成就第六說一印曼荼羅若持毗盧遮那
真言及金剛薩埵菩薩具十七尊餘皆具十
三亦說入曼荼羅儀與弟子受先行法修集
本尊三摩地

次說降三世大品有六曼荼羅如來成等正
覺已於須彌盧頂轉金剛界輪已與諸菩薩
名號受職已摩醯首羅等剛彊難化不可以

寂靜法而受化盡虛空徧法界一切如來異
口同音請以一百八名讚禮金剛薩埵如是
諸天不可以寂靜法而受化一切如來請以
即入忿怒金剛三摩地現大威德身以種種
方便調伏乃至至死摩醯首羅死已自見於
下方過六十二恒河沙世界名灰莊嚴彼世
界中成等正覺名爲怖畏自在王如來執金
剛菩薩以脚按上誦金剛壽命真言復得穌
既受化已金剛薩埵則說大曼荼羅引入諸
天受金剛名號諸天有五類第一居上界天

王摩醯首羅等無量諸天及后第二遊虛空
諸天日天子等無量諸天及后第三居虛空
天魔王等無量諸天及后第四地居天主藏
天等無量諸天及后第五地下嚩囉呬天等
無量諸天及后悉皆引已入勅諸天建立諸
曼荼羅汝等赴會所求一切悉皆與成辦此
等皆是外金剛部

第一說曼荼羅儀則皆具三十七說降伏法
及修神通法第二說祕密曼荼羅具三十七
說引弟子儀此中諸音聲及金剛歌舞第三

說曼荼羅具三十七說引入弟子儀此中說
以慈悲喜捨作阿毗遮嚩迦法微細金剛調
心軌儀第四說羯磨曼荼羅具三十七說入
曼荼羅儀令弟子學護摩儀軌於無量佛菩
薩所成廣大供養速得悉地現前說二十五
種護摩爐隨類所求法第五說四印曼荼羅
具二十一成就諸藥法等已上四曼荼羅中
成就法於此曼荼羅中成就法於此曼荼羅
像前求第六說一印曼荼羅具十七說引入
弟子及先行法

次爲外金剛部衆說四種曼荼羅各說本真言本印契獻佛佛爲說教勅大曼荼羅具三十七說引入弟子儀說爲弟子使役金剛部軌則此中說大佛頂及光聚佛頂真言及契亦通一字頂輪法次說第二教勅三昧耶曼荼羅彼諸天后等各獻本真言佛爲說曼荼羅具三十七說爲弟子說修藥叉女法廣說諸儀軌次第三說教勅法曼荼羅諸天說真言獻佛佛爲彼等說曼荼羅具三十七說引入弟子儀爲弟子說諸天之法法印由此印

不違越本誓次第四說教勅羯磨曼荼羅具三十七說引入弟子儀彼等諸天各說本真言佛爲說曼荼羅說諸天舞儀說成就諸事業速疾法

次說徧調伏大品有六種曼荼羅第一大曼荼羅具三十七皆觀自在菩薩變現說引入弟子儀此中說十六種成就速疾神通三摩地儀第二說三昧耶曼荼羅具三十七皆觀自在菩薩變現說引入弟子儀此中說鈎召敬愛十六種三摩地第三說法曼荼羅具三

十七皆觀自在菩薩變現說引入弟子儀此
中說修心及求智慧辯才法十六種第四說
羯磨曼荼羅具三十七皆觀自在菩薩變現
說引入弟子儀此中說蓮華部供養儀及轉罪
障報障蓋纏業障法第五說蓮華部四印曼
荼羅具二十一皆觀自在菩薩變現說引入
弟子儀此中說成就先行法及成就先行如
上四種曼荼羅法第六說蓮華部印一印曼
荼羅具十三皆觀自在菩薩變現說引入弟
子儀此中說修本尊法通修世間出世間法

次說一切義成就大品中有六曼荼羅第一
大曼荼羅具三十七此中說引入弟子儀由
入此曼荼羅除貧匱業說求豐財求佛菩薩
位及世間榮位第二秘密三昧耶曼荼羅具
三十七此中說引入弟子儀說求伏藏法速
滿檀波羅蜜福德聚法第三法曼荼羅具三
十七此中說引入弟子儀說寶部中修三摩
地法令心安住令心堪任令心調柔令心自
在見虛空藏菩薩第四羯磨曼荼羅具三十
七此中說引入弟子儀說加持掘伏藏事業

法并說寶部中廣大供養諸佛儀第五四印
曼荼羅具二十一說引入弟子儀說修先行
法及說修四曼荼羅中悉地法第六一印曼
荼羅具十三說引入弟子儀說修一尊法及
修諸藥等三摩地皆是則彼婆伽梵執金剛
虛空藏變化次都說如前一曼荼羅中秘
密助成方便散誦次後示釋迦牟尼佛降於
閻浮提變化身八相成道皆是普賢菩薩幻
化一切如來還以一百八名讚揚金剛薩埵
如是第一會次說第二會名一切如來秘密

主瑜伽於色究竟天說具四大品廣說微細
實相理及廣說降摩醯首羅天以偈與金剛
菩薩酬答

次說第三會名一切教集瑜伽於法界宮殿
說一切如來異口同音問金剛薩埵菩薩一
百八問金剛薩埵菩薩一一答此經中說大
曼荼羅五部一一部中五曼荼羅各具三十
七都成一大曼荼羅一一尊各各說四印所
謂大印三昧耶印法印羯磨印各說成就法
此經中說一百三十五種護摩爐一一爐所

求各異次說第四會名降三世金剛瑜伽於
須彌盧頂說金剛藏等八大菩薩一一尊各
說四種曼荼羅初會說降伏摩醯首羅及說
天人曼荼羅受職受名號四種曼荼羅所謂
大曼荼羅三昧耶曼荼羅法曼荼羅羯磨曼
荼羅及一切尊第八說引入弟子儀及成就法後
都說尊三昧耶結印次第及說秘密禁戒及
秘密修行第五會名世間出世間金剛瑜伽
於波羅奈國空界中略說五佛曼荼羅及諸
菩薩諸外金剛部曼荼羅一一曼荼羅具四

種各說引入弟子儀及求悉地法第六會名
大安樂不空三昧耶真實瑜伽於陀化自在
天宮說此經中說普賢菩薩曼荼羅次說毗
盧遮那曼荼羅次後說金剛藏等至金剛拳
菩薩及外金剛部說般若理趣一一尊具說
四種曼荼羅各說引入弟子儀授理趣般若
波羅蜜多及授四種印法品中各說求世間
出世間悉地法第七會名普賢瑜伽於普賢
菩薩宮殿中說普賢菩薩等至金剛拳菩薩
及外金剛部一一尊各說四種曼荼羅說引

入弟子儀說受四種印修世間出世間悉地
 此經中說修行人無時無方不依世間禁戒
 以菩提心為先無為戒為本第八會名勝初
 瑜伽於普賢宮殿說普賢菩薩等至外金剛
 部各各說四種曼荼羅說實相理及分別諸
 曼荼羅儀則稍廣於第七會說大略同第九
 會名一切佛集會拏吉尼戒網瑜伽於真言
 宮殿此中說立自身為本尊瑜伽訶身外至
 形像瑜伽者廣說實相理并說五部根源并
 說瑜伽法具九味所謂華麗金剛薩埵勇健毗盧遮那

第八

九

大悲持金剛喜笑觀自瞋恚金剛恐怖降三狀
 愚釋迦牟尼奇特金剛寂靜瑜伽中毗盧遮那說普賢
 菩薩等至金剛拳各說四種曼荼羅及引入
 弟子儀及授四種印并說五部中歌讚舞儀
 第十會名大三昧耶瑜伽於法界宮殿說普
 賢菩薩等至金剛拳十六大菩薩各各說四
 種曼荼羅說引入弟子儀授四種印法此中
 說偈云
 愚童覆無智 不知此理趣 餘處而求佛
 不悟此處有 十方世界中 餘處不可得

心自爲等覺 餘處不說佛

第十一會名大乘現證瑜伽於阿迦尼吒天
說毗盧遮那佛等金剛至毗首羯磨菩薩及
八大供養四攝出生同真實攝瑜伽一一尊
具四種曼荼羅四種印廣說實相理心建立
曼荼羅儀則第十二會名三昧耶最勝瑜伽
於空界菩提場說毗盧遮那等四部中上首
菩薩金剛拳等第八菩薩及外金剛部各各
說四種曼荼羅四印等此經中於自身上建
立曼荼羅說自身本尊瑜伽廣說阿字門通

達於染淨有爲無爲無礙第十三會名大三
昧耶真實瑜伽於金剛界曼荼羅道場說十
方一切佛異口同音請金剛薩埵惟願說三
昧耶真實教法我等先已受訖惟願金剛薩
埵爲諸菩薩說得請已說普賢菩薩十七字
真言說適悅不空曼荼羅具十七亦說四種
曼荼羅說一百八道契說通求世間出世間
悉地隨此諸菩薩及外金剛部各各說本曼
荼羅本真言本印契竟普賢菩薩說秘密中
曼荼羅十七尊支分各復入本尊身共成五

尊同居一蓮華臺說一字真言從眼口及一切支分變異即成印但住大印結羯磨印不待先行不藉結護加持亦不假迎請宿業罪障不能凌逼亦不障礙速疾成就第十四會名如來三昧耶真實瑜伽此經中普賢菩薩十六大菩薩四攝成一身說四種曼荼羅四印廣說五部互圓融如來部即金剛蓮華部即寶部互相涉入法界即真如般若即實際於假施設有異於本即一體次普賢後諸菩薩及外金剛部各各說本真言本曼荼羅本

印契第十五會名秘密集會瑜伽於秘密處說所謂喻婆伽處說號般若波羅蜜宮此中說教法壇印契真言住禁戒以如世間貪染相應語會中除蓋障菩薩等從座而起禮佛白言世尊大人不應出麤言雜染相應語佛言汝等清淨相應語有何相狀我之此語加持文字應化緣方便引入佛道亦無相狀成大利益汝等不應生疑從此廣說實相三摩地諸菩薩各各說四種曼荼羅四印第十六會名無二平等瑜伽於法界宮說毗盧遮那

佛及諸菩薩并外金剛部等各各四種曼荼羅具四印此中說生死涅槃世間出世間自他平等無二種心舉自聲香味觸雜染思慮住亂心無二同真如法界皆成一切佛身第十七會名如虛空瑜伽住實際宮殿說毗盧遮那佛普賢菩薩及外金剛部一一說四種曼荼羅具四種印此中修行者與一一尊相應皆量同虛空法身相應利一切萬物法體光明量同虛空無來無去此經中說虛空三摩地相應法第十八會名金剛寶冠瑜伽於

第四靜慮天金剛薩埵菩薩佛爲大梵天婆訶世界主說五部瑜伽曼荼羅引入弟子儀具三十七亦說四種曼荼羅具四印下至外金剛部爲弟子授學心念誦於月輪上有旋列眞言字住心於一字實相理相應用而復始亦通成就世間出世間悉地不假持珠徧數以爲劑限但證理門心不散動住本尊瑜伽爲限微細說不成就二十種相及說鄰近悉地多種相瑜伽教十八會或四千頌或五千頌或七千頌都成十萬頌具五部四種

曼荼羅四印具三十七尊一一部具三十七
乃至一尊成三十七亦具四曼荼羅四印互
相涉入如帝釋網珠光明交映展轉無限修
行者善達此瑜伽中大意如徧照佛一身
分一一毛孔一一相一一隨形好一一福德
第八
資糧一一智慧資糧住於果位演說瑜伽三
十二
乘不共佛法說曼荼羅三昧邪法門事業量
同虛空證者如上所說各各分劑各不雜亂
圓證四身所謂自性身受用身變化身等流
身是能作頓利樂一切有情諸菩薩聲聞緣

覺及諸外道名瑜伽金剛乘教法

金剛頂瑜伽十八會指歸

訶利帝母真言法

唐特進試鴻臚卿三藏沙門大德智不空奉詔譯

爾時訶利帝藥叉女在佛眾會從座而起五
體投地禮佛雙足而白佛言我有心真言猶
如真多摩尼寶能滿一切意願為利益安樂